

Uishike Nguvu ya Mungu

Ndipo ulipowaambia watakatifu wako kwa njozi, Ukasema, nimempa aliye hodari msaada; Nimemtukuza aliyechaguliwa miongoni mwa watu.

Zaburi 89:19.

Bwana anakupenda. Bwana ni mwenye huruma. Ahadi Yake ni, “Mkaribieni Mungu, naye atawakaribia ninyi” (Yakobo 4:8). Adui atakapoingia kama mafuriko, Roho wa Bwana atakuinulia bendera dhidi yake. Zingatia kwamba Yesu Kristo ndiye tumaini lako. Katika mambo ya huzuni na ya kukatisha tamaa yatakayokujia wakati wowote, Kristo anakuambia, “Au azishike nguvu zangu, Afanye amani nami; Naam, afanye amani nami.” (Isaya 27:5).

Kazi yako ni kuishika nguvu ile imara kama kilivyo kiti cha enzi cha milele. Mwamini Mungu. Mtumaini Yeye. Uwe mchangamfu katika hali zote. Ingawa unaweza kuwa na majaribio, jua kwamba Kristo aliteseka na mambo haya yenye kuumiza kwa niaba ya warithi Wake. Hakuna kitu kilicho cha thamani kubwa kwa Bwana kama kanisa Lake. Bwana huangalia moyo. Anawajua walio Wake. Bwana ataipima na kuithibitisha kila roho inayoishi. “Wengi watajitakasa, na kujifanya weupe, na kusafika; bali wabaya watatenda mabaya; wala hataelewa mtu mbaya awaye yote; bali wao walio na hekima ndio watakaelewa.” (Danieli 12:10)

Hebu wale wanaompenda Mungu wawe ni watendaji wa neno Lake na waimbe sifa na shukrani badala ya kusema maneno ya kushutumu na kutafuta makosa na kunung'unika. Bwana atawabariki wale wanaofanya amani....

Mtumainini Bwana. Msiruhusu hisia, kauli au mtazamo wa wakala yeyote wakibinadamu uwakatishe tamaa. Jihadharini kwamba katika maneno au matendo hamtoi kwa wengine nafasi yoyote ya kutumia katika kuwadhuru. Endeeleni kumtazama Yesu. Yeye ndiye nguvu yenu. Kwa kumtazama Yesu mtabadilishwa na kufanana Naye. Yeye atakuwa afya ya uso wako na Mungu wako....

Kanisa linakuhitaji nawe unapaswa kulainisha na kutuliza hisia zako kwa ajili ya Kristo. Anataka uwe na Roho Wake Mtakatifu ili apate kukutengeneza. Ndipo mtakapoweza kuleta uhai na faraja kwa kanisa. Hebu maneno yenu na yawe yaliyochaguliwa vema ili mpate kuwa baraka halisi kwa kanisa. Msizitese roho zenu kwa sababu ya wengine kutokufuata utaratibu. Wajibikeni na mwe na msimamo katika mambo yote.